

Nkombo ya Nkolo na biso YESU KRISTO epambolama libela na libela. Boyei malamumu na boyekoli ya buku ya Emoniseli, lelo tokobanda na mokapo ya liboso. Totanga...

“1 Emoniseli ya Yesu Kristo, oyo Nzambe apesaki ye mpo na kolakisa basaleli na ye makambo oyo esengeli kosalema noki; mpe atindaki yango na nzela ya anzelu mpo na kolakisa yango epai ya mosaleli na ye Yoane.

2 Ye nde apesaki litatoli ya Liloba ya Nzambe mpe ya litatoli ya Yesu Kristo, ya nyonso oyo amonaki.”

(Emoniseli 1:1-2 — Mokanda na Bomoi)

Na ebandeli, tomoni Yoane azali koloba “Emoniseli ya Yesu Kristo”, elingi koloba ete emoniseli oyo ezalaki ya Yoane te, kasi ya Yesu Ye moko.

Bobosana te ete Yoane azalaki motoma oyo azalaki pene mingi na Nkolo, mpe Yesu alingaki ye mingi. Azalaki moto oyo azalaki kofanda pene na motema ya Nkolo tango nyonso (*Yoane 13:23; Yoane 21:20*). Yango wana, tango Yesu alobaki ete moko kati na bango akoteka Ye, Petelo apesaki Yoane elembu mpo atuná Nkolo nani akozala moteki, mpo ayebaki ete Yoane azalaki molingami ya

Nkolo.

Likambo yango ya boyokani na ye ya sipesiale na Nkolo nde esalaki ete apesama ngolu ya kozwa EMONISELI oyo etali makambo ekosalema na mikolo na ye mpe na mikolo ya nsuka.

Yoane azali lokola mosakoli Daniele, oyo mpe Nzambe alingaki mingi mpe apesaki ye bimoniseli minene. Yango elakisi ete bimoniseli minene epesamaka na moto nyonso te, kasi na moto oyo asepelisaka Nzambe. Ndenge moko mpe biso, soki tosepelisi Nkolo, akofungolela biso mabombami na Ye.

Bolamu ya kotanga, koyoka mpe kosalela Liloba

“Esengo na moto oyo azali kotanga mpe baoyo bazali koyoka maloba ya esakweli oyo, mpe bazali kobatela makambo ekomami kati na yango; mpo ntango ekómi pene.”
(Emoniseli 1:3 — Mokanda na Bomoi)

Awa Biblia elobi ete azali na esengo moto oyo:

- AZALI KOTANGA
- AZALI KOYOKA (na matoyi ya molimo, elingi koloba kozwa emoniseeli)
- AZALI KOSALELA makambo ayoki.

Bato nyonso te bazwaka ngolu ya kososola buku oyo, mpo ezali buku oyo Molimo Mosantu nde afungolaka. Soki ozwi ngolu yango, sala makasi ozala na bomoi oyo ekokani na yango mpo obengama moto ya esengo.

Mbote epai ya Mangomba Nsambo

*“4 Yoane, epai ya mangomba nsambo oyo ezali na Asia: ngolu mpe kimia ezala epai na bino, eutaka epai ya Ye oyo azalaki, oyo azali mpe oyo akoya; mpe eutaka epai ya milimo nsambo oyo ezali liboso ya kiti na Ye ya bokonzi;
5 mpe eutaka epai ya Yesu Kristo, Motatoli ya sembo, mwana ya liboso kati na bakufi mpe Mokonzi ya bakonzi ya mokili...”*
(Emoniseeli 1:4-6 — Mokanda na Bomoi)

Yoane apesi mbote na mangomba nsambo. Alobi ngolu mpe kimia eutaka epai ya Ye oyo azalaki, oyo azali mpe oyo akoya, kolakisa ete Nzambe azali seko — azali na ebandeli te mpe na nsuka te.

“Milimo nsambo” elingi koloba te ete Nzambe azali na milimo nsambo, kasi ezali kolakisa ndenge Molimo ya Nzambe azalaki kosala kati na mangomba nsambo.

Nzambe autaki na seko mpe akotaki na ntango mpo na kobikisa bato. Abongisaki nzoto oyo akofanda kati na yango — yango nde Yesu. Nzambe azalaki kati na Kristo mpo na kozongisa mokili epai na Ye moko (2 Bakorinto 5:18-19).

“Nzambe amimonisaki kati na nzoto.”
(1 Timote 3:16 — Mokanda na Bomoi)

Yango elakisi ete Nzambe azali moko, Molimo moko.

Alfa mpe Omega

*“7 Tala, azali koya na mapata; mpe miso nyonso ekomona
Ye...
8 Nazali Alfa mpe Omega, ebandeli mpe nsuka, elobi Nkolo
Nzambe, Mozwi-Nguya-Nyonso.”*

(Emoniseli 1:7-8 — Mokanda na Bomoi)

Biblia elobi Yesu akoya lisusu, mpe bato nyonso bakomona Ye. Oyo ezali koya na Ye ya mibale na mokili elongo na basantu na Ye.

(Tanga mpe Matai 24:29-30; Yuda 1:14; Emoniseli 19:11-21)

Yoane na esanga ya Patimo

“9 Ngai Yoane, ndeko na bino mpe moninga na bino na mpasi, na Bokonzi mpe na kokanga motema kati na Yesu... nazalaki na esanga oyo babengaka Patimo mpo na Liloba ya Nzambe.”
(Emoniseli 1:9-11 — Mokanda na Bomoi)

Patimo ezalaki esika ya boloko oyo bato batindamaka mpo na kokufa. Ezalaki esika ya mpasi mingi. Kasi kuna nde Nkolo apesaki Yoane bimoniseli minene.

Liteya mpo na biso: mbala mingi, kati na mimekano nde Nzambe apesaka bimoniseli ya sika.

Moto lokola Mwana ya Moto

*“12... namonaki bitelemelo nsambo ya miinda ya wolo;
13 mpe na katikati na yango moto moko lokola Mwana ya
Moto...”*

(Emoniseli 1:12-15 — Mokanda na Bomoi)

Makambo Yoane amonaki ezalaki emoniseli (vision), nzoto ya solo te. Nyonso ezalaki na ndimbola:

- Nsuki mpembe → azali Mosambisi ya bosembo
- Miso lokola moto → amonaka makambo nyonso
- Makolo lokola bronze → akonyata mabe nyonso

Mopanga oyo ebimaka na monoko

“16 ... mopanga moko ya mino mibale ebimaki na monoko na

Ye.”

(Emoniseli 1:16 — Mokanda na Bomoi)

Mopanga yango ezali Liloba ya Nzambe.

“Liloba ya Nzambe ezali na bomoi mpe na nguya, mpe eleki mopanga nyonso ya mino mibale...”

(Baebale 4:12 — Mokanda na Bomoi)

Liloba yango ekosambisa bato ya kati ya lingomba mpe ya libanda.

Yoane akweyi liboso ya Nkolo

“17 Tango namonaki Ye, nakweyaki lokola moto akufi...

Alobaki: Kobanga te! Nazali Ya Liboso mpe Ya Nsuka.

18 Nazali Moto ya bomoi; nakufaki kasi tala, nazali na bomoi libela na libela; mpe nazali na bafungola ya liwa mpe ya lifelo.”

(Emoniseli 1:17-18 — Mokanda na Bomoi)

Na bizaleli misato oyo, Yoane asosolaki ete Moto yango azalaki
YESU KRISTO:

1. Ya Liboso mpe Ya Nsuka
2. Azali na bomoi libela
3. Azali na bafungola ya liwa mpe lifelo

Ndelo ya mokapo oyo

Mokapo oyo ya liboso ezali moboko ya kososola buku mobimba ya Emoniseli, ndenge moko na ndoto ya mokonzi Nebukadanesala na buku ya Daniele, epai biteni nyonso ezalaki na ndimbola.

Ndenge moko mpe, komonana mpe bizaleli ya Yesu Kristo awa ezali fungola ya kososola mikapo oyo ekolanda.

Nzambe apambola yo mingi!

Kobosana te kolanda mokapo oyo ekolanda.

Share on:
WhatsApp